

# Mon cœur m'a fait commandement

Mon cueur m'a fait commandement

De venir vers vostre jeunesse,

Belle que j'ayme loyaument (1),

Comme doy faire ma princesse.

Se vous demandés Pourquoi esse ?

C'est pour savoir quant vous plaira

Alegier sa dure destresse

Ma Dame, le sauray je ja (2) ?

Dictez le par vostre serment !

Je vous fais leale (3) promesse

Nul ne le saura, seulement

Fors que lui pour avoir leesse.

Or lui moustrés qu'estes maistresse

Et lui mandez qu'il guerira,

Ou s'il doit morir de destresse !

Ma Dame, le sauray je ja ?

Penser ne porroit nullement

Que la douleur, qui tant le blesse,

Ne vous desplaie aucunement.

Or faictes dont tant qu'elle cesse

Et le remectez en l'adresse

D'espoir, dont il party pieça (4) !

Repondez sans que plus vous presse !

Ma Dame le sauray je ja ?

1. Loyaument : Loyalement. 2. Ja : Bientôt. 3. Leale : Loyale. 4. Pieça : Il y a longtemps.

Charles d'Orléans (1394–1465)